

Хойрдгч фермин көдләчнр депутатин кандидатларн харгъв

Приозерн района «Сухотинский» совхозин 2-ч фермин көдләчнр, Хальмг АССР-н Дед Советин депутатин кандидат Илишкин Иванла харгъцхав.

Түрүн босдж үг келсн, итклтә күн Б. Надбитов, хальмгин итклтә нег үрн үр Илишкин Ивана тускар тодрха кевәр олн сунъгъачнрт цәәлгъдж өгв. Октябрь сарин 19-д болх сунъгъврин өдр, коммунистрин болн партийн биш улсин хамцлтин кандидат Илишкин Ивана төлә цугъар дуугъан өгцхәй гидж эн цуг сунъгъачнриг дуудв.

Хургт босдж үг келцхәсн сунъгъачнр, мана даалгъвриг үр Илишкин Иван күцәх гидж иткджәнәвдн, цугъар энүнә төлә дуугъан өгцхәхмн гидж нег дуугъар батлцхадж, бийстән даалгъврмуд авцхав.

Гуртин гардач үр Гурьев П. болн малч Батнасунов Б. сунъгъврин өдр күртл хаша-хаацан ясцхадж, малдан үвлин хотинь фермүрн зөөгъад, нег чигн гару угагъар хәләджәсн малмудан үвләс гаргъх даалгъврмуд авцхав.

— Үни седкләсн ханджанав, чидлән әрвллго олна төлә зүткдж, итклитн күцәхв,— гидж хургин сүүләр депутатин кандидат үр Илишкин Иван цугълрсн олн сунъгъачнрт герчлв.